



KOMUNIKADO PA PRENSA

Fecha

23 di sèptèmber 2016

Kolaboradó di Maneho

Corinne Leysner

Email

corinne.leysner@gobiernu.cw

REKONSTRUKSHON DI PISCADERAWEG TA KUMINSA

Willemstad – Minister Suzy-Camelia-Romer di Ministerio di Tráfiko, Transporte i Planifikashon Urbano i Servisio pa Obra Públiko, ta anunsiá inisio di e proyekto di rekonstrukshon di Piscaderaweg riba 25 di september 2016. E proyekto tin un durashon di seis luna.

Den pasado, habitantenan di Piscaderaweg a pidi na diferente okashon pa hasi algu na e situashon di e kaya aki, ku ta konekta Mundo Nobo ku Piscadera. E kaya ta hopi usa dor di outomobilistanan ku ke evitá pasa riba kaya grandi. Diferente aksidente serio, di kual unu tabata fatal pa un mucha muhé chikitu, a mustra ku mester bin ku diferente medida pa hasi e tráfiko mas sigur.

Minister Suzy Camelia-Römer a laga pone drèmpel riba e kaminda, despues ku e habitantenan a pidi pa yudansa, tanten ku por a traha riba un solushon mas duradero. Mientrastantu a traha riba e ingeniaría i e destaho públiko. Awor ke tur e partinan aki ta tras di lomba, por kuminsá ku e trabounan mes. Esakinan ta enserá ku ta drecha e kaminda, pero tambe e asera i e sistema di riol.

E trabou ta den man di kontratista MNO-Vervat. Durante ehekushon di e proyekto, outomobilistanan mester hasi uso di rutan di desviashon ku ta keda indiká via bòrchinan. Apesar di esaki, tur habitante por sali i yega nan kas sin muchu problema. Por tin molèster di zonido i stòf. Ta pidi habitantenan pa tene kompreshon ku esakinan i ta gradisí di antemano pa e kooperashon.